


CÔR merched y garth

1977 - 2000



DATHLU LLWYDDIANT

Nid yn aml mae'r Cymry yn brolio eu hunain ond mae hanes Côr Merched y Garth yn destun haeddiannol i'w adrodd a'i ddathlu ar gychwyn canrif newydd.

Mae'r côr wedi ennill naw gwaith yn yr Eisteddfod Genedlaethol, pum gwaith yn yr Ŵyl Gerdd Dant ac wedi bod yn bencampwyr yr Ŵyl Ban-Geltaidd. Mae arweinyddion y côr wedi ennill dwy fedal - Medal Aur Clogau a Medal Noel John a gwahoddwyd y côr i fod yn rhan o ddathlu agor y Cynulliad Cenedlaethol.



Parti Merched y Garth yn cystadlu yn Eisteddfod Caerdydd 1978.

Merched y Garth

Mae'r ias ynom â'r seiniau - yn agor
Y neges mewn geiriau;
Swyn y gainc a'r gerdd sy'n gwau
Mewn nê o harmonïau.

Rhys Dafis

PA BENBLWYDD YDYN NI'N EI DDATHLU DWEDWCH?

Sawl Parti?

Wedi i Meinir ddysgu'r gosodiad ar gyfer y partiön (Eisteddfod Caerdydd 1978) sylweddolwyd fod mwy nag un ar bymtheg o aelodau'n dod i ymarfer o Sul i Sul felly cofrestrwyd dau barti, Merched y Garth a Merched Bro Taf. (Un parti yn unig wnaeth gystadlu yn y pen draw, sef Merched y Garth).

I Heulwen Thomas, un o aelodau gwreiddiol Côr Merched y Garth mae'r diolch ein bod ni yma'n dathlu.

Wrth inni gyd-deithio gyda Chôr Telynu Tywi ar draws y môr i Drá Li ym Mis Ebrill 1999 mi wnaeth Heulwen ein hatgoffa fod ein côr yn dathlu pen-blwydd yn un ar hugain oed. Bu rhyw fân siarad am ddathlu yn ystod y tridiau yn Nhrá Li ac ar ôl dychwelyd o'r Iwerddon yn fuddugoliaethus penderfynwyd bwrw ati i drefnu noson o ddathlu.

Does yna ddim cofnod pendant o'r union ddyddiad y sefydlwyd y parti gan Meinir Heulyn, ond wrth fynd ati i chwilio a chwilota sylweddolwyd ein bod wedi cystadlu yng Ngŵyl Gerdd Dant Talybont yn 1977 a'n bod wedi cynnal cyngerdd yn Nhreorci i ddathlu Gŵyl Ddewi yn 1978. Felly, fe welwch ein bod ychydig yn hŷn na'r un flwydd ar hugain!

Ta waeth am yr union ddyddiad, y peth pwysig yw fod Côr Merched y Garth YMA O HYD a bod yr aelodau presennol yn cael y fraint o ddathlu yng nghwmni nifer fawr o'n cyn-aelodau.



CYNGHERDDAU

Bu'r côr yn brysur iawn yn y dyddiau cynnar yn cynnal cyngerddau ar hyd

a lled De Ddwyrain Cymru. Fe fuon ni ym Mhenybont ar Ogwr, Casnewydd, Caerdydd, Llanbradach, Dinas Powys a Llantrisant yn diddanu Cymdeithasau Cymraeg. Fe wnaethon ni gynorthwyo Merched y Wawr Hirwaun, Y Creigiau a Phentre'r Eglwys i ddathlu Gŵyl Ddewi.

Buom droeon i Dreorci ac i ardal Caerffili. Roedd gennym gefnogwr brwd yn y diweddar, annwyl Mrs Lilly Richards, "Ardderchog : Ffantastig, ferched bach! Daliwch ati" oedd ei hanogaeth bob tro.

Cawsom y fraint o rannu llwyfan gydag Elinor Bennett yng Ngŵyl Bro'r Preseli.

Daeth gwahoddiadau o dros y ffin i ni gynnal cyngerddau yn Llundain, Caerfaddon a Bryste. Braint oedd cael canu ar lwyfan Neuadd Dewi Sant yng Nghaerdydd yng Ngŵyl Telynau'r Byd 1991 ac adeg Eisteddfod yr Urdd yn Nhaf Elái. (Faint ohonoch sydd yn cofio'r cyflwyniad 'gwefreiddiol' o Ffinlandia ar ddiwedd y noson?)

Gymru difraw, daw y dydd
Y gweli dy gwilydd.
Ni all sôn ennill senedd,
Ni ddaw fyth heb newydd fedd.
Ac am hynny, Gymru, gwêl
Y gôr sydd ar y gorwel.

G.L.L.O.



Llun ar gyfer Cyngerdd yr Urdd yn 1988



Canu mewn Noson Lawen yn Llanwrtyd 1993.

Mae'n debyg mae un o'r breintiau mwyaf a ddaeth i ran y côr oedd cael ein gwahodd i ganu yng Ngwasanaeth Agor y Cynulliad yn yr Eglwys Gadeiriol yn Llandaf. Bydd y wefr o fod yno'n canu yn aros yn y cof am byth ac yn benllanw cyfnod o ddeng mlynedd o arweinyddiaeth ysbrydoledig gan Menna.

Awn ymlaen gyda Llinos i gyfnod pellach o weithgaredd prysur, gobeithio. Mae'r hwyl a gawsom yn Abergwaun, Salem Canton ac yn Y Tabernacl ym Mhenybont ar Ogwr yn ddiweddar yn argoeli'n dda iawn i'r dyfodol.

Y côr yng Ngwasanaeth Agor y Cynulliad yn Llandaf 1999.





AR GOF A CHADW

Eiddil Fimsoa drwy ddylif misoedd,
Hwyliai i'w hantur ar wamal wyntoedd,
Ei chragen yn herio'r llydan foroedd,
A rhoddwyd i'w llywio freuddwyd lluoedd;
Anelu o fro'r niwloedd - digariad,
A morio i wlad y mawr oludoedd.

R.B.W.

TORRI RECORD

Ym Medi 1982 gwahoddodd Cwmni Sain y Côr i recordio detholiad o'r Awdl "Patagonia" gan R. Bryn Williams a Salm 84 i'w cynnwys ar Record Telyn Cymru 5.

Ym Mis Medi 1987 cyhoeddodd y Côr gaset. Alwena wrth gwrs oedd piau'r gosodiadau campus ac mi gyfrannodd Eirlys Gravelle yn helaeth i'r record gyda'i threfniadau celfydd o'r alawon gwerin. Roedd yn braf cael croesawu Meinir Heulyn yn ôl i gyfeilio ar y delyn.



Llun o glawr y record, Telyn Cymru 5, 1982

TELEDU A RADIO

Wrth i'r Côr fynd o nerth i nerth gan ennill yn gyson yn Yr Eisteddfod Genedlaethol a'r Wyl Gerdd Dant cawsom wahoddiadau lu i ymddangos ar y teledu tua chanol yr wythdegau. Cawsom ein gwahodd i ganu gan Mair Carrington Roberts, gwestai ar un o raglenni Meredydd Evans yn y gyfres, "Canu Penillion". Ai dyma'r tro cyntaf i ni wisgo ein ffrogiau Berkertex glas a gwyn?

Fe ymddangosodd y Côr ar "Rhaglen Hywel Gwynfryn" ac ar "Dechrau Canu, Dechrau Canmol" yn 1985 ac ar raglen "Trebor" yn 1986. Fe fuon ni'n cystadlu ar raglen Gareth Glynne, "Am y Corau" gan guro ein gwrthwynebwyr, Côr Blaenporth o Geredigion. A fu erioed y fath berfformiad o "Unwaith eto Nghymru annwyl"?

Ymddangosodd y Côr bob Nos Sul am fis ar gyfres Jenny Ogwen, "Cais am Gân". Cawsom daith hudolus i Ddyfed i'r Eglwys Gadeiriol yn Nhŷ Ddewi i gyfrannu i raglen "Nadolig y Beirdd". Ym Medi 1997 treuliodd noson anghyfforddus iawn yn eistedd ar fyrnau gwair am oriau yn recordio eitemau ar gyfer y gyfres Noson Lawen. Cyfrannodd y Côr ddwy waith i "Oedfa'r Bore" o'r Tabernacl, Efail Isaf.

Profiad hynod oedd ceisio canu Cerdd Dant byrfyfyr ar raglen Alwyn Samuel, "Alaw ac Anian".

Telynorion

Meinir Heulyn
Alwena Roberts
Bethan Roberts
Eirian Dyfri
Lowri Ffranco
Kathryn Thomas
Kathryn Rees



Dwy o delynorion y côr -
Lowri Ffranco a Bethan Roberts



GWOBRAU LU

**Bu'r Côr yn cystadlu'n gyson ar hyd y blynyddoedd.
Bu'r llwyddiant a gafwyd yn ysgubol!**

Pan ddelo'r adar i gynnwys ganu
Eu halaw dirion i'm hail hyderu,
A phan ddaw amser i'r hin dynneru,
I braidd eni ðyn, i briddyn wynnu,
Af innau i gyfannu - cylch y rhod,
Yn ôl i osod a'r ddol yn glasu.

D.J.

Yr Eisteddfod Genedlaethol

- 1981 Gwobr gyntaf ym Machynlleth
- 1982 Gwobr gyntaf yn Abertawe
- 1983 Trydedd wobwr yn Llangefni
- 1984 Trydedd wobwr yn Llanbedr Pont Steffan yn cystadlu ar y Cyflwyniad Llafar (Carol Hardy yn ein hyfforddi)
- 1986 Gwobr gyntaf yn Abergwaun. (Alwena'n derbyn Medal Aur Clogau)
- 1988 Gwobr gyntaf yng Nghasnewydd.
- 1989 Gwobr gyntaf yn Nyffryn Conwy. (Menna'n hyfforddi am y tro cyntaf)
- 1990 Ail wobwr yng Nghwm Rhymni. (Cystadlu yng nghystadleuaeth y Côr Gwerin).
- 1992 Gwobr gyntaf yn Aberystwyth
- 1993 Gwobr gyntaf yn Llanellwedd
- 1994 Gwobr gyntaf yng Nghastell Nedd
"Roedd profiad ac aeddfedrwydd Côr Merched y Garth wedi gwthio nhw rhyw fymryn bach o flaen y lleill i'r safle buddugol," Alwyn Samuel.
- 1996 Ail wobwr yn Llandeilo. "Diolch i'm cyd-feirniaid er nad oeddwn i'n cytuno â nhw. Ond maen nhw'n ddwy un ydw i!" Gaynor Hall.
- 1998 Gwobr gyntaf ym Mhenybont ar Ogwr. (Menna'n derbyn Gwobr Goffa Noel John.)



Eisteddfod Cwm Rhymni 1990

"Lleisiau ifanc rhagorol a chafwyd unoliaeth lleisiol hyfryd. Ymdriniaeth wych o'r awdl. Diweddglo gorfoleddus i'r garol."

Mair Carrington Roberts.
Abertawe 1982.

"Y côr a roddodd inni'r diweddglo mwyaf erotig oedd Merched y Garth gyda'i "Hai" anadlog, llesmeirol, orgasmidd oedd yn ddiweddglo mor addas i'r geiriau "artistri felfed ei chusan yn dawnsio'n wyllt trwy ei waed!"

Hafina Clwyd yn y Western Mail ar ôl Gŵyl Gerdd Dant, Aberystwyth 1997.

"Cawsom wefr o wrando ar eich datganiadau a'r ddau ddarn yn ein llwyr argyhoeddi."

Menai Williams.
Bro Ogwr 1998

Yr Ŵyl Gerdd Dant

- 1985 Gwobr gyntaf yn Nyffryn Lliw
- 1987 Gwobr gyntaf ym Mro'r Bannau
" Lleisiau gwych! Roedd y geiriau ar hyd y ffordd yn pefrio! Eu haeddfedrwydd yn hollol amlwg," Trefor Edwards.
- 1988 Gwobr gyntaf ym Mhwillheli .
- 1991 Trydedd wobwr yn Y Barri.
- 1992 Trydedd wobwr yn Y Rhyl.
- 1993 Ail wobwr yn Hen-dy-gwyn-ar-daf
" Lleisiau hynod o gyfoethog! Canu grymus." Glesni Jones.
- 1995 Gwobr gyntaf ym Mhenybont-ar-Ogwr
"Lleisiau rhagorol ac ni chollwyd UN cyfle i fynd o dan groen y geiriau. Y datganiad o'r emyn yn llawn angerdd," Alwena Roberts.
- 1996 Gwobr gyntaf yng Nghaernarfon.
"Dehongliad sensitif a lleisio campus. Gosod hyfryd a'r cyfan oll wedi ei saernïo yn ofalus." Aled Lloyd Davies.

Gŵyl Gorawl Corwen 1989 - Dyfarnwyd yr ail wobwr i'r côr.
"Lleisiau cyfoethog dros ben. Yn gwbl gerddorol yn eu hymdriniaeth o'r cyfalawon a rheiny bob amser yn wych! Canu'n rhwydd a diymdrech.
Menai Williams ac Aled Lloyd Davies.



ARWEINYDDION

Mawrygwn di o Dduw,
Am bob celfyddyd gain,
Am harddwch ffurf a llun
Am bob melynster sain,
Ti'r hwn sy'n puro ein dyheu
Bendithia gamp y rhai sy'n creu.
W. RH. N.

Pedair Arweinyddes Merched y Garth a chymwynaswyr eraill!

A fu côr erioed mor ffodus yn ei arweinyddion? I ddechrau, Meinir Heulyn, y daeth iddi'r syniad o greu parti cerdd dant yng nghyrrion Pontypridd a hau hadau'r hen draddodiad mewn daear a oedd i bob golwg yn ddigon diffaith. A feddyliodd Meinir erioed y basai'r syniad yn cydio cystal? Ond wedyn, pa well heuwr a allai fod wedi bwrw'r had i'r ddaear? Meistres y tannau yn dod â'i medrau proffesiynol ac elfennau gorau'r byd amatur gwerinol at ei gilydd. Roedd yr argoelion yn dda! Bu cystadlu mewn Gôyl ac Eisteddfod a buan y cafodd y parti ifanc ei draed dano.

Wrth i yrfa Meinir fel telynores gyda'r Cwmni Opera Cenedlaethol ddatblygu, a hithau'n gorfod bod oddi cartref gryn dipyn, trodd ei golygon at un o aelodau ifanc y côr, merch a oedd wedi ymuno'n ddiweddar ac yn dysgu'r delyn yn ysgolion y cylch, ac fe'i gwahoddwyd i gymryd at yr awenau. Un o Lanerfyl oedd Alwena Roberts yn wreiddiol, o hil o gerdd-dantwyr, ac un a oedd wedi treulio cyfnod yn cyfeilio i Barti'r Ffin cyn troi tua'r de. Dan arweinyddiaeth Alwena y trodd y parti yn gôr ac wedi cyfnod o ymlafnio dan law perffeithydd digyfaddawd, dechreuwyd mwynhau ambell lwyddiant. Bu Alwena'n ein harwain



am oddeutu deng mlynedd, ac yn naturiol mae gan yr aelodau lu o atgofion amdani, nid yn unig am ei hymchwil am berffeithrwydd a'i gofal am bob gair a chymal, ond hefyd am ei ffraethinebau (ac am ei chystwyo didrugaredd!). Hyd yn oed ar ôl ennill rhyw gystadleuaeth neu'i gilydd, roeddem yn ddigon tebygol o fod dan y lach y nos Iau ganlynol. 'Mi gianoch chi'n reit dde nos Sadwrn, coelio ... dech chi'n ddiawchedig heno!' Fel

pob cerdd-dantydd da, roedd gan Alwena gydymdeimlad greddfol â'r gair a'r gerddoriaeth, ac roedd ei gosodiadau, wrth gwrs, yn berlau - mae rhai yn dal yn rhan annatod o *repertoire* y côr dros ddeng mlynedd yn ddiweddarach.

Pan ddaeth yn amser i Alwena ddychwelyd i'r Gogledd, roedd cryn fwch i'w lenwi, ond rhywsut, doedd fawr o waith chwilio am arweinydd newydd. Unwaith eto, syrthiodd y fantell ar un o aelodau'r côr, a'r tro yma ar ferch o Forgannwg a oedd yn byrlymu o farddoniaeth a cherddoriaeth. Ni fydd neb sydd wedi clywed rhai o delynegion iasol Menna Thomas ar Dalwrn y Beirdd yn synnu pan ddywedaf mai ei gallu i ddehongli cerdd oedd un o'i phennaf doniau. Ac ymhell cyn iddi gymryd at awenau Merched y Garth roedd wedi profi ei gallu i arwain partïon gwerin a cherdd dant Ysgol Gyfun Rhydfelen ac wedi cael

llwyddiannau lu mewn Eisteddfodau a Gwyliau Cerdd Dant. Buan y datblygodd y gallu i osod cerdd dant, ac ymhenn fawr o dro, roedd Menna'n cael ei chyfrif ymhlith gosodwyr ceinaf y grefft. Buan hefyd y gwelsom nad oedd ffraethineb Menna chwaith i'w gadw dan lestr. Buom yn 'Bryn Terfeleiddio' gyda'r goreuon ac yn canu'n 'Dia Mari'aid' ac ... wel, allwn ni ddim ailadrodd popeth a glywyd yn ystod degawd teyrnasiad Menna yn Festri'r Tabernacl. Byddai'r saint yn troi yn y fynwent y tu allan aml i nos Iau!



Eisteddfod Genedlaethol Castell Nedd 1994

Ac yna, daeth Llinos. I Llinos mae'r diolch ein bod yn dal i ganu, yn dal i fwynhau. Bu'n aelod o'r côr o'r dechrau, a bu sawl côr arall hefyd yn falch o'i gwasanaeth dros y blynyddoedd. Canodd fel unawdydd ar lwyfannau clasurol a gwerinol a bu'n hyfforddi plant i ganu'r ffidl ers blynyddoedd. Daeth â chwa o awyr iach i'r ymarferion ac arlwy newydd ac amrywiol i'n herio. Taflodd ei hun i'r gwaith o arwain y côr ym mhob ystyr gyda'r brwdfrydedd a'r afiaith sy'n nodweddiadol ohoni, ac ymatebodd y côr yn llawen.

Wrth ddathlu'r cyfnod o dros ugain mlynedd o gyd-ganu, mae'n diolch yn fawr i'r pedair arweinyddes am rannu â ni eu doniau llachar. Cofiw'n hefyd am nifer o rai eraill y buom yn ffodus iawn o'u gwasanaeth. Eirlys Gravelle, aelod o'r côr ar un cyfnod a gyfoethogodd ein *repertoire* a'i threfniannau medrus o alawon gwerin a chaneuon ysgafn Cymru. Telynorion hefyd - wedi cyfnod Meinir ac Alwena bu'n rhaid mynd ar ofyn nifer o wahanol delynorion a chafwyd cymwynasau parod gan lawer. Bu Eirlys Lamb yr un mor barod i gyfeilio ar y piano mewn ymarfer a chyngerdd. A diolch arbennig hefyd i Ray Phillips, ein trysorydd ac i Eleri Roberts, ein hysgrifenyddes. O'r dechrau, dibynnodd y côr yn drwm ar sgiliau trefnu'r ddwy - sawl cinio, trip, cyngerdd a chystadleuaeth a drefnwyd ganddynt dros y blynyddoedd? A hynny heb air o rwngach ac yn gwbl ddiffwdan.

Ac yn olaf, diolch i Loreen a'i thîm am drefnu'r dathliad hwn. A phob llwyddiant i'r côr yn y milblynyddoedd nesaf!



AR GRWYDR

Yr Ŵyl Ban Geltaidd

Ni a'n histerics yw'r anystyriol,
Ond ni'r dihirod yw'r llais hanfodol
Ni yw'r gweddill, ond ein cân dragwyddol
Heddiw a erys. Drwy'n sgrech fyddarol,
Ni yw swm y presennol.
Ni yw'r her:
Yn dwf o hyder, ni yw'r dyfodol.

M.Mc.H.

Teithiodd y Côr ddwy waith i'r Iwerddon i'r Ŵyl Ban Geltaidd.

Yng Nghil Airne yn 1984 fe'n synwyd ni gan drefniadau hamddenol yr Æyl. Doedd yna fawr neb ar wahân i'r beirniaid yn gwrando arnom yn canu yn y gystadleuaeth a gorfod inni gystadlu â rhyw fand swmlyd y tu draw i'r pared tra'n canu mewn Noson Lawen!

Ond bu'n daith hynod o ddifyr a phawb wedi cael cyfle i ymlacio'n llwyr.

Aethom eto i'r Ŵyl yn 1999, i Drá Li y tro hwn a dychwelyd yn fuddugoliaethus. Derbyniaisom darian ychwanegol am Gôr Gorau'r Ŵyl a chafodd Llinos ganmoliaeth arbennig am ei chyfraniad unigryw yn yr alaw werin "Lisa Lân".

Cawsom bedwar diwrnod i'w cofio yno ac yn goron ar y cyfan cael dod yn ôl i'r gwesty yn Waterford i wylio tîm rygbi Cymru yn curo'r Saeson. Bydd yn rhaid trefnu taith arall i'r ŵyl cyn hir!



Trá Li yn 1999



Gŵyl Telynu'r Byd 1991 yn Neuadd Dewi Sant



Crwydro Iwerddon yn 1984



Gŵyl Cerdd Dant Dyffryn Lliw 1985



BRO'R GARTH

Roedd ardal y Garth wedi'i Seisnigeiddio dros y blynyddoedd ond ar ddechrau'r saithdegau daeth llygedyn o obaith i'r cylch gyda sefydlu Eisteddfod Gadeiriol Cylch Godre'r Garth. O ganlyniad i'r brwdfrydedd yn yr Eisteddfod gyntaf honno ffurfiwyd côr cymysg, Côr Godre'r Garth, i gystadlu yn Eisteddfod Genedlaethol Caerfyrddin 1974.

Daeth llwyddiant Côr Godre'r Garth â rhyw hyder ac ynni newydd i fywyd diwylliannol yr ardal a buan y ffurfiwyd Côr Merched y Garth gan gychwyn ar gyfnod euraidd o ganu cerdd dant yn y fro.

Erbyn dechrau'r wythdegau ffurfiwyd Parti Dawns Nantgarw, cwmni sydd yn arloesi ym myd dawnsio gwerin yn ogystal â chadw traddodiadau gorau'r grefft.

Bu'n gyfnod o gystadlu brwd yn ystod yr wythdegau. Yn 1985 cyflwynwyd Medal Aur Clogau i Wil Morus Jones, arweinydd Côr Godre'r Garth, y côr cymysg buddugol yn Eisteddfod Genedlaethol y Rhyl. Yn 1986, yn Eisteddfod Genedlaethol Abergwaun, cyflwynwyd ail Fedal Aur Clogau i Alwena Roberts, arweinydd Côr Merched y Garth, y Côr Cerdd Dant buddugol. Ac yn 1987 cyflwynwyd Medal Aur Gwynfynydd i Eirlys Britton, Hyfforddwraig Dawnsyr Nantgarw. Wedi hynny dilëwyd y wobwr gyda'r tair medal aur yn aros yn ddiogel yn ardal Godre'r Garth.

Ail-adroddwyd y llwyddiant yn 1998 pan aeth y wobwr gyntaf yn y tair prif gystadleuaeth yn Eisteddfod Genedlaethol Bro Ogwr i'r Côr, y Merched a'r Dawnsyr o ardal y Garth.

**Dathlu a mwynhau
golygfeydd yn Nhrá Li 1999.**

Bydd yma genedl pan fydd cenedloedd
Yn anghofiedig, a'u heangfydoedd
Bydd yma nodded tra bydd mynyddoedd
Bydd eco'r glewion tra bydd creigleoedd,
A bydd iaith tra bydd ieithoedd, - a'u geiriau
Yn rhoi oeriasau i lawr yr oesoedd.

G.L.L.O.




Dathlu llwyddiant Eisteddfod Bro Ogwr 1998

Diolch

I aelodau'r côr am eu lluniau, i Loreen Williams am roi trefn ar y hanes ac i Penri Williams am baratoi'r llyfryn hwn. I Bryn Roberts, Cwmni Barcud Derwen am baratoi fideo'r dathlu.



Cwmni Bysiau Edwards



Ffôn:

Os am logi bws - 01443 208600

Os am drefnu gwyliau - 01443 202048

Prif Swyddfa'r Cwmni
Llanilltud Faerdref
Pontypridd
CF38 2EE

Ffacs: 01443 217583



**Llongyfarchiadau
a phob hwyl
ar y
Dathlu
oddi wrth**

Barcud Derwen

**Llongyfarchiadau
i
Gôr Merched y Garth**

**Oddi wrth
Staff
Gwesty'r Bae
Caerdydd**



**Ffordd Schooner
Bae Caerdydd
CF10 4RT
Ffôn: 029 20475000
Ffacs: 029 20481491**